

珍袖

臨

濟

錄

假名付

全

特41

291



019729-000-0

特41-291

鎮州臨濟慧照禪師語錄

義玄/述

M43.11

ABG-0534





特41  
291

養德

子園

膠

明治  
43.11.21  
白

明治新刻

臨濟錄

禪書林  
柳枝軒藏版



再復好

古稀可也

古稀可也



鎮州臨濟慧照禪師語錄序

延康殿學士金紫光祿大夫眞定府路安撫使兼馬步軍都總管兼知成德軍府事馬防撰

黃檗山頭曾遭痛棒大愚肋下方解築拳饒舌

老婆尿牀鬼子這風顛漢再捋虎鬚巖谷栽松

後人標榜饅頭斷地幾被活埋冑箇後生驀口

自攔辭焚几案坐斷舌頭不是河南便歸河北

院臨古渡運濟往來把定要津壁立萬仞奪人

奪境陶鑄仙陀三要三立鈴鎚衲子常在家舍



不離途中無位真人面門出入兩堂齊喝賓主  
歷然照用同時本無前後菱花對像虛谷傳聲  
妙應無方不留朕跡拂衣南邁戾止大名興化  
師承東堂迎侍銅餅鐵盜掩室杜詞松老雲閒  
曠然自適面壁未幾密付將終正法誰傳瞎驢  
邊滅圓覺老演今為流通點檢將來故無差  
舛唯餘一喝尙要商量具眼禪流冀無賺舉宣  
和庚子中秋日謹序

鎮州臨濟慧照禪師語錄

住三聖嗣法小師 慧然集

府主王常侍與諸官請師陞座師上堂云山僧  
今日事不獲已曲順人情方登此座若約祖宗  
門下稱揚大事直是開口不得無你措足處山  
僧此日以常侍堅請那隱綱宗還有作家戰將  
直下展陣開旗麼對衆證據看僧問如何是  
佛法大意師便喝僧禮拜師云這箇師僧卻堪



持論問師唱誰家曲宗風嗣阿誰師云我在  
黃檗處三度發問三度被打僧擬議師便喝隨  
後打云不可向虛空裏釘橛去也 有座主問  
三乘十二分教豈不是明佛性師云荒艸不曾  
鋤主云佛豈賺人也師云佛在什麼處主無語  
師云對常侍前擬瞞老僧速退速退妨他別人  
請問復云此日法筵爲一大事故更有問話者  
麼速致問來你纔開口早勿交涉也何以如此

不見釋尊云法離文字不屬因不在緣故爲你  
信不及所以今日葛藤恐滯常侍與諸官員味  
他佛性不如且退喝一喝云少信根人終無了  
日久立珍重  
師因一日到河府府主王常侍請師陞座時麻  
谷出問大悲千手眼那箇是正眼師云大悲千  
手眼那箇是正眼速道速道麻谷拽師下座麻  
谷卻坐師近前云不審麻谷擬議師亦拽麻谷



下座師卻坐麻谷便出去師便下座  
上堂云赤肉團上有一無位真人常從汝等諸  
人面門出入未證據者看看時有僧出問如何  
是無位真人師下禪牀把住云道道其僧擬議  
師托開云無位真人是什麼乾屎橛便歸方丈  
上堂有僧出禮拜師便喝僧云老和尚莫探頭  
好師云你道落在什麼處僧便喝又有僧問如  
何是佛法大意師便喝僧禮拜師云你道好喝

也無僧云草賊大敗師云過在什麼處僧云再  
犯不容師便喝是日兩堂首座相見同時下喝  
僧問師還有賓主也無師云賓主歷然師云大  
衆要會臨濟賓主句問取堂中二首座便下座  
上堂僧問如何是佛法大意師豎起拂子僧便  
喝師便打又僧問如何是佛法大意師亦豎  
起拂子僧便喝師亦喝僧擬議師便打師乃  
云大衆夫爲法者不避喪身失命我二十年在



黃檗先師處三度問佛法的的大意三度蒙他  
賜杖如蒿枝拂著相似如今更思得一頓棒喫  
誰人爲我行得時有僧出衆云某甲行得師拈  
棒與他其僧擬接師便打  
上堂僧問如何是劔刃上事師云禍事禍事僧  
擬議師便打問祇如石室行者踏碓忘卻移脚  
向什麼處去師云沒溺深泉 師乃云但有來  
者不虧欠伊總識伊來處若與麼來恰似失卻

不與麼來無繩自縛一切時中莫亂斟酌會與  
不會都來是錯分明與麼道一任天下人貶剝  
久立珍重  
上堂云一人在孤峰頂上無出身之路一人在  
十字街頭亦無向背那箇在前那箇在後不作  
維摩詰不作傅大士珍重  
上堂云有一人論劫在途中不離家舍有一人  
離家舍不在途中那箇合受人天供養便下座



上堂僧問如何是第一句師云三要印開朱點  
側未容擬議主賓分問如何是第二句師云妙  
解豈容無著問漚和爭負截流機問如何是第  
三句師云看取棚頭弄傀儡抽牽都來裏有人  
師又云一句語須具三立門一立門須具三要  
有權有用汝等諸人作麼生會下座  
師晚參示衆云有時奪人不奪境有時奪境不  
奪人有時人境俱奪有時人境俱不奪時有僧

問如何是奪人不奪境師云煦日發生鋪地錦  
櫻孩垂髮白如絲僧云如何是奪境不奪人師  
云王令已行天下徧將軍塞外絕煙塵僧云如  
何是人境兩俱奪師云并汾絕信獨處一方僧  
云如何是人境俱不奪師云王登寶殿野老謳  
謳師乃云今時學佛法者且要求真正見解  
若得真正見解生死不染去住自由不要求殊  
勝殊勝自至道流祇如自古先德皆有出人底



路如山僧指示人處祇要你不受人惑要用便  
用更莫遲疑如今學者不得病在甚處病在不  
自信處你若自信不及即便忙忙地徇一切境  
轉被他萬境回換不得自由你若能歇得念念  
馳求心便與祖佛不別你欲得識祖佛麼祇你  
面前聽法底是學人信不及便向外馳求設求  
得者皆是文字勝相終不得他活祖意莫錯諸  
禪德此時不遇萬劫千生輪迴三界徇好境撥

去驢牛肚裏生道流約山僧見處與釋迦不別  
今日多般用處欠少什麼六道神光未曾間歇  
若能如是見得祇是一生無事人大德三界無  
安猶如火宅此不是你久停住處無常殺鬼一  
剎那間不揀貴賤老少你要與祖佛不別但莫  
外求你一念心上清淨光是你屋裏法身佛你  
一念心上無分別光是你屋裏報身佛你一念  
心上無差別光是你屋裏化身佛此三種身是



你即今日前聽法底人祇爲不向外馳求有此  
功用據經論家取三種身爲極則約山僧見處  
不然此三種身是名言亦是三種依古人云身  
依義立土據體論法性身法性土明知是光影  
大德你且識取弄光影底人是諸佛之本源一  
切處是道流歸舍處是你四大色身不解說法  
聽法脾胃肝膽不解說法聽法虛空不解說法  
聽法是什麼解說法聽法是你目前歷歷底勿

一箇形段孤明是這箇解說法聽法若如是見  
得便與祖佛不別但一切時中更莫間斷觸目  
皆是祇爲情生智隔想變體殊所以輪迴三界  
受種種苦若約山僧見處無不甚深無不解脫  
道流心法無形通貫十方在眼曰見在耳曰聞  
在鼻嗅香在口談論在手執捉在足運奔本是  
一精明分爲六和合一心既無隨處解脫山僧  
與麼說意在什麼處祇爲道流一切馳求心不



能歇上他古人間機境道流取山僧見處坐斷  
報化佛頭十地滿心猶如客作兒等妙二覺擔  
枷鎖漢羅漢辟支猶如廁穢菩提涅槃如繫驢  
概何以如此祇爲道流不達三祇却空所以有  
此障礙若是真正道人終不如是但能隨緣消  
舊業任運著衣裳要行即行要坐即坐無一念  
心希求佛果緣何如此古人云若欲作業求佛  
佛是生死大兆大德時光可惜祇擬傍家波波

地學禪學道認名認句求佛求祖求善知識意  
度莫錯道流你祇有二箇父母更求何物你自  
返照看古人云演若達多失卻頭求心歇處即  
無事大德且要平常莫作摸樣有一般不識好  
惡禿奴便即見神見鬼指東劃西好晴好雨如  
是之流盡須抵債向閻老前吞熱鐵丸有日好  
人家男女被這一般野狐精魅所著便即捏怪  
瞎屢生索飯錢有日在



師示衆云道流切要取真正見解向天下橫  
行免被這一般精魅惑亂無事是貴人但莫造  
作祇是平常你擬向外傍家求過覓脚手錯了  
也祇擬求佛佛是名句你還識馳求底麼三世  
十方佛祖出來也祇爲求法如今參學道流也  
祇爲求法得法始了未得依前輪迴五道云何  
是法法者是心法心法無形通貫十方目前現  
用人信不及便乃認名認句向文字中求意度

佛法天地懸殊道流山僧說法說什麼法說心  
地法便能入凡入聖入淨入穢入真入俗要且  
不是你真俗凡聖能與一切真俗凡聖安著名  
字真俗凡聖與此人安著名字不得道流把得  
便用更不著名字號之爲立旨山僧說法與天  
下人別祇如有箇文殊普賢出來目前各現一  
身問法纔道咨和尙我早辨了也老僧穩坐更  
有道流來相見時我盡辨了也何以如此祇爲



我見處別外不取凡聖內不住根本見徹更不  
疑謬

師示衆云道流佛法無用功處祇是平常無事  
屙屎送尿著衣喫飯困來卽臥愚人笑我智乃  
知焉古人云向外作工夫總是癡頑漢你且隨  
處作主立處皆真境來回換不得縱有從來習  
氣五無間業自爲解脫大海今時學者總不識  
法猶如觸鼻羊逢著物安在口裏奴郎不辨賓

主不分如是之流邪心入道鬧處卽入不得名  
爲真出家人正是真俗家人夫出家者須辨得  
平常真正見解辨佛辨魔辨真辨僞辨凡辨聖  
若如是辨得名真出家若魔佛不辨正是出一  
家人一家喚作造業衆生未得名爲真出家祇  
如今有一箇佛魔同體不分如水乳合鵝王喫  
乳如明眼道流魔佛俱打你若愛聖憎凡生死  
海裏浮沈



問如何是佛魔師云你一念心疑處是箇魔你若達得萬法無生心如幻化更無一塵一法處處清淨是佛然佛與魔是染淨二境約山僧見處無佛無衆生無古無今得者便得不歷時節無修無證無得無失一切時中更無別法設有法過此者我說如夢如化山僧所說皆是道流即今目前孤明歷歷地聽者此人處處不滯通貫十方三界自在入一切境差別不能回換

一刹那間透入法界逢佛說佛逢祖說祖逢羅漢說羅漢逢餓鬼說餓鬼向一切處游履國土教化衆生未曾離一念隨處清淨光透十方萬法一如道流大丈夫兒今日方知本來無事祇爲你信不及念念馳求捨頭覓頭自不能歇如圓頓菩薩入法界現身向淨土中厭凡忻聖如此之流取捨未忘染淨心在如禪宗見解又且不然直是現今更無時節山僧說處皆是一期



藥病相治總無實法若如是見得是真出家日  
消萬兩黃金道流莫取次被諸方老師印破面  
門道我解禪解道辨似懸河皆是造地獄業若  
是真正學道人不求世間過切急要求真正見  
解若達真正見解圓明方始了畢

問如何是真正見解師云你但一切入凡入聖  
入染入淨入諸佛國土入彌勒樓閣入毘盧遮  
那法界處處皆現國土成住壞空佛出于世轉

大法輪卻入涅槃不見有去來相貌求其生死  
了不可得便入無生法界處處游履國土入華  
藏世界盡見諸法空相皆無實法唯有聽法無  
依道人 是諸佛之母所以佛從無依生若悟無  
依佛亦無得若如是見得者是真正見解學人  
不了爲執名句被他凡聖名礙所以障其道眼  
不得分明祇如十二分教皆是表顯之說學者  
不會便向表顯名句上生解皆是依倚落在因



果未免三界生死你若欲得生死去住脫著自由即今識取聽法底人無形無相無根無本無住處活鱗鱗地應是萬種施設用處祇是無處所以覓著轉遠求之轉乖號之爲秘密道流你莫認著箇夢幻伴子遲晚中間便歸無常你向此世界中覓箇什麼物作解脫覓取一口飯喫補彘過時且要訪尋知識莫因循逐樂光陰可惜念念無常蟲則被地水火風細則被生住異

滅四相所逼道流今時且要識取四種無相境免被境擺樣

問如何是四種無相境師云你一念心疑被地來礙你一念心愛被水來溺你一念心嗔被火來燒你一念心喜被風來飄若能如是辨得不被境轉處處用境東涌西沒南涌北沒中涌邊沒邊涌中沒履水如地履地如水緣何如此爲達四大如夢如幻故道流你祇今聽法者不是



你四大能用你四大若能如是見得便乃去住  
自由約山僧見處勿嫌底法你若愛聖聖者聖  
之名有一般學人向五臺山裏求文殊早錯了  
也五臺山無文殊你欲識文殊麼祇你目前用  
處始終不異處處不疑此箇是活文殊你一念  
心無差別光處處總是真普賢你一念心自能  
解縛隨處解脫此是觀音三昧法互為主伴出  
則一時出一卽三三卽一如是解得始好看教

師示衆云如今學道人且要自信莫向外覓總  
上他閑塵境都不辨邪正祇如有祖有佛皆是  
教迹中事有人拈起一句子語或隱顯中出便  
卽疑生照天照地傍家尋問也太忙然大丈夫  
兒莫祇麼論主論賊論是論非論色論財論說  
閑話過日山僧此間不論僧俗但有來者盡識  
得伊任伊向甚處出來但有聲名文句皆是夢  
幻卻見乘境底人是諸佛之玄旨佛境不能自



稱我是佛境還是這箇無依道人乘境出來若  
 有人出來問我求佛我即應清淨境出有人問  
 我菩薩我即應慈悲境出有人問我菩提我即  
 應淨妙境出有人問我涅槃我即應寂靜境出  
 境即萬般差別人即不別所以應物現形如水  
 中月道流你若欲得如法直須是大丈夫兒始  
 得若妻妻隨隨地則不得也夫如斃嘆上音西下  
所嫁切  
 之器不堪貯醍醐如大器者直要不受人惑隨

處作主立處皆真但有來者皆不得受你一念  
 疑即魔入心如菩薩疑時生死魔得便但能息  
 念更莫外求物來即照你但信現今用底一箇  
 事也無你一念心生三界隨緣被境分為六塵  
 你如今應用處欠少什麼一剎那間便入淨入  
 穢入彌勒樓閣入三眼國土處處遊履唯見空  
 名  
 問如何是三眼國土師云我共你入淨妙國土



中著清淨衣說法身佛又入無差別國土中著  
 無差別衣說法報身佛又入解脫國土中著光明  
 衣說法化身佛此三眼國土皆是依變約經論家  
 取法身為根本報化二身為用山僧見處法身  
 即不解說法所以古人云身依義立土據體論  
 法性身法性土明知是建立之法依通國土空  
 拳黃葉用誑小兒蒺藜菱刺枯骨上覓什麼汁  
 心外無法內亦不可得求什麼物你諸方言道

有修有證莫錯設有修得者皆是生死業你言  
 六度萬行齊修我見皆是造業求佛求法即是  
 造地獄業求菩薩亦是造業看經看教亦是造  
 業佛與祖師是無事人所以有漏有為無漏無  
 為為清淨業有一般瞎禿子飽喫飯了便坐禪  
 觀行把捉念漏不令放起厭喧求靜是外道法  
 祖師云你若住心看靜舉心外照攝心內澄凝  
 心入定如是之流皆是造作是你如今與麼聽



法底人作麼生擬修他證他莊嚴他渠且不是  
修底物不是莊嚴得底物若教他莊嚴一切物  
卽莊嚴得你且莫錯道流你取這一般老師口  
裏語爲是真道是善知識不思議我是凡夫心  
不敢測度他老宿瞎屢生你一生祇作這箇見  
解辜負這一雙眼冷噤噤地如凍凌上驢駒相  
似我不敢毀善知識怕生口業道流夫大善知  
識始敢毀佛毀祖是非天下排斥三藏教罵辱

諸小兒向逆順中覓人所以我於十二年中求  
一箇業性如芥子許不可得若似新婦子禪師  
便即怕越出院不與飯喫不安不樂自古先輩  
到處人不信被遞出始知是貴若到處人盡肯  
堪作什麼所以師子一吼野干腦裂道流諸方  
說有道可修有法可證你說證何法修何道你  
今用處欠少什麼物修補何處後生小阿師不  
會便卽信這般野狐精魅許他說事繫縛他人



言道理行相應護惜三業始得成佛如此說者  
如春細雨古人云路逢達道人第一莫向道所  
以言若人修道道不行萬般邪境競頭生智劍  
出來無一物明頭未顯暗頭明所以古人云平  
常心是道大德覓什麼物現今目前聽法無依  
道人歷歷地分明未曾欠少你若欲得與祖佛  
不別但如是見不用疑誤你心心不異名之活  
祖心若有異則性相別心不異故卽性與相不

別

問如何是心心不異處師云你擬問早異了也  
性相各分道流莫錯世出世諸法皆無自性亦  
無生性但有空名名字亦空你祇麼認他閑名  
爲實大錯了也設有皆是依變之境有箇菩提  
依涅槃依解脫依三身依境智依菩薩依佛依  
你向依變國土中覓什麼物乃至三乘十二分  
教皆是拭不淨故紙佛是幻化身祖是老比丘



你還是娘生已否你若求佛即被佛魔攝你若  
求祖即被祖魔縛你若求佛即被佛魔攝你若  
一般禿比丘向學人道佛是究竟於三大阿僧  
祇劫修行果滿方始成道道流你若道佛是究  
竟緣什麼八十年後向拘尸羅城雙林樹間側  
臥而死去佛今何在明知與我生死不別你言  
三十二相八十種好是佛轉輪聖王應是如來  
明知是幻化古人云如來舉身相爲順世間情

恐人生斷見權且立虛名假言三十二八十也  
空聲有身非覺體無相乃真形你道佛有六通  
是不可思議一切諸天神仙阿脩羅大力鬼亦  
有神通應是佛否道流莫錯祇如阿脩羅與天  
帝釋戰戰敗領八萬四千眷屬入藕絲孔中藏  
莫是聖否如山僧所舉皆是業通依通夫如佛  
六通者不然入色界不被色惑入聲界不被聲  
惑入香界不被香惑入味界不被味惑入觸界



不被觸惑入法界不被法惑所以達六種色聲  
香味觸法皆是空相不能繫縛此無依道人雖  
是五蘊漏質便是地行神通道流真佛無形真  
法無相你祇麼幻化上頭作模作樣設求得者  
皆是野狐精魅并不是真佛是外道見解夫如  
真學道人并不取佛不取菩薩羅漢不取三界  
殊勝迥然獨脫不與物拘乾坤倒覆我更不疑  
十方諸佛現前無一念心喜三塗地獄頓現無

一念心怖緣何如此我見諸法空相變即有不  
變即無三界唯心萬法唯識所以夢幻空花何  
勞把握唯有道流目前現今聽法底人入火不  
燒入水不溺入三塗地獄如遊園觀入餓鬼畜  
生而不受報緣何如此無嫌底法你若愛聖憎  
凡生死海裏沈浮煩惱由心故有無心煩惱何  
拘不勞分別取相自然得道須叟你擬傍家波  
波地學得於三祇劫中終歸生死不如無事向



叢林中牀角頭交脚座道流如諸方有學人來  
主客相見了便有一句子語辨前頭善知識被  
學人拈出箇機權語路向善知識口角頭擡過  
看你識不識你若識得是境把得便拋向坑子  
裏學人便即尋常然後便索善知識語依前奪  
之學人云上智哉是大善知識即云你大不識  
好惡如善知識把出箇境塊子向學人面前弄  
前人辨得下下作主不受境惑善知識便即現

半身學人便喝善知識又入一切差別語路中  
擺撲學人云不識好惡老秃奴善知識歎曰真  
正道流如諸方善知識不辨邪正學人來問善  
提涅槃三身境智瞎老師便與他解說被他學  
人罵著便把棒打他言無禮度自是你善知識  
無眼不得嗔他有一般不識好惡秃奴即指東  
劃西好晴好雨好燈籠露柱你看眉毛有幾莖  
這箇具機緣學人不會便即心狂如是之流總



是野狐精魅魍魎被他好學人隘隘微笑言瞎  
老秃奴惑亂他天下人道流出家兒且要學道  
祇如山僧往日曾向毘尼中留心亦曾於經論  
尋討後方知是濟世藥表顯之說遂乃一時拋  
卻即訪道參禪後遇大善知識方乃道眼分明  
始識得天下老和尚知其邪正不是娘生下便  
會還是體究練磨一朝自省道流你欲得如法  
見解但莫受人惑向裏向外逢著便殺逢佛殺

佛逢祖殺祖逢羅漢殺羅漢逢父母殺父母逢  
親眷殺親眷始得解脫不與物拘透脫自在如  
諸方學道流未有不依物出來底山僧向此間  
從頭打手上出來手上打口裏出來口裏打眼  
裏出來眼裏打未有一箇獨脫出來底皆是上  
他古人閑機境山僧無一法與人祇是治病解  
縛你諸方道流試不依物出來我要共你商量  
十年五歲并無一人皆是依艸附葉竹木精靈



野狐精魅向一切糞塊上亂咬瞎漢枉消他十  
方信施道我是出家兒作如是見解向你道無  
佛無法無修無證祇與麼傍家擬求什麼物瞎  
漢頭上安頭是你欠少什麼道流是你目前用  
底與祖佛不別祇麼不信便向外求莫錯向外  
無法內亦不可得你取山僧口裏語不如休歇  
無事去已起者莫續未起者不要放起便勝你  
十年行脚約山僧見處無如許多般祇是平常

著衣喫飯無事過時你諸方來者皆是有心求  
佛求法求解脫求出離三界癡人你要出三界  
什麼處去佛祖是賞繫底名句你欲識三界麼  
不離你今聽法底心地你一念心貪是欲界你  
一念心嗔是色界你一念心癡是無色界是你  
屋裏家具子三界不自道我是三界還是道流  
目前靈靈地照燭萬般酌度世界底人與三界  
安名大德四大色身是無常乃至脾胃肝膽髮



毛爪齒唯見諸法空相你一念心歇得處喚作  
菩提樹你一念心不能歇得處喚作無明樹無  
明無住處無明無始終你若念念心歇不得便  
上他無明樹便入六道四生披毛戴角你若歇  
得便是清淨身界你一念不生便是上菩提樹  
三界神通變化意生化身法喜禪悅身光自照  
思衣羅綺千重思食百味具足更無橫病菩提  
無住處是故無得者道流大丈夫漢更疑箇什

麼目前用處更是阿誰把得便用莫著名字號  
爲玄旨與麼見得勿嫌底法古人云心隨萬境  
轉轉處實能幽隨流認得性無喜亦無憂道流  
如禪宗見解死活循然參學之人大須子細如  
主客相見便有言論往來或應物現形或全體  
作用或把機權喜怒或現半身或乘獅子或乘  
象王如有真正學人便喝先拈出一箇膠盆子  
善知識不辨是境便上他境上作摸作樣學人



便喝前人不肯放此是膏盲之病不堪醫喚作  
客看主或是善知識不拈出物隨學人問處即  
奪學人被奪抵死不放此是主看客或有學人  
應一箇清淨境出善知識前善知識辨得是境  
把得拋向坑裏學人言大好善知識即云咄哉  
不識好惡學人便禮拜此喚作主看主或有學  
人披枷帶鎖出善知識前善知識更與安一重  
枷鎖學人歡喜彼此不辨呼爲客看客大德山

僧如是所舉皆是辨魔揀異知其邪正道流實  
情大難佛法幽玄解得可地山僧竟日與他  
說破學者總不在意千徧萬徧脚底踏過黑沒  
燒地無一箇形段歷歷孤明學人信不及便向  
名句上生解年登半百祇管傍家負死屍行擔  
卻擔子天下走索草鞋錢有日在大德山僧說  
向外無法學人不曾便即向裏作解便即倚壁  
坐舌拄上齶湛然不動取此爲是祖門佛法也



大錯是你若取不動清淨境爲是你卽認他無  
明爲耶主古人云湛湛黑暗深坑實可怖畏此  
之是也你若認他動者是一切艸木皆解動應  
可是道也所以動者是風大不動者是地大動  
與不動俱無自性你若向動處捉他他向不動  
處立你若向不動處捉他他向動處立譬如潛  
泉魚鼓波而自躍大德動與不動是二種境還  
是無依道人用動用不動如諸方學人來山僧

此間作三種根器斷如中下根器來我便奪其  
境而不除其法或中上根器來我便境法俱奪  
如如上上根器來我便境法人俱不奪如有出格  
見解人來山僧此間便全體作用不歷根器大  
德到這裏學人著力處不通風石火電光卽過  
了也學人若眼定動卽沒交涉擬心卽差動念  
卽乖有人解者不離目前大德你擔鉢囊屎擔  
子傍家走求佛求法卽今與麼馳求底你還識



渠麼活潑潑地祇是勿根株不聚撥不散求  
 著即轉遠不求還在目前靈音屬耳若人不信  
 徒勞百年道流一刹那間便入華藏世界入毘  
 盧遮那國土入解脫國土入神通國土入清淨  
 國土入法界入穢入淨入凡入聖入餓鬼畜生  
 處處討覓尋皆不見有生有死唯有空名幻化  
 空花不勞把捉得失是非一時放卻道流山僧  
 佛法的的相承從麻谷和尚丹霞和尚道一和

尚廬山與石鞏和尚一路行徧天下無人信得  
 盡皆起謗如道一和尚用處純一無雜學人三  
 百五百盡皆不見他意如廬山和尚自在真正  
 順逆用處學人不測涯際悉皆忙然如丹霞和  
 尚翫珠隱顯學人來者皆悉被罵如麻谷用處  
 苦如黃蘗近皆不得如石鞏用處向箭頭上覓  
 人來者皆懼如山僧今日用處真正成壞翫弄  
 神變入一切境隨處無事境不能換但有來求



者我即便出看渠渠不識我我便著數般衣學人  
生解一向入我言句苦哉瞎禿子無眼人把我  
著底衣認青黃赤白我脫卻入清淨境中學人  
一見便生忻欲我又脫卻學人失心忙然狂走  
言我無衣我即向渠道你識我著衣底人否忽  
爾回頭認我了也大德你莫認衣衣不能動人  
能著衣有箇清淨衣有箇無生衣菩提衣涅槃  
衣有祖衣有佛衣大德但有聲名文句皆悉是

衣變從臍輪氣海中鼓激牙齒敲磕成其句義  
明知是幻化大德外發聲語業內表心所法以  
思有念皆悉是衣你祇麼認他著底衣爲實解  
縱經塵劫祇是衣通三界循環迴生死不如  
無事相逢不相識共語不知名今時學人不得  
蓋爲認名字爲解大策子上抄死者漢語三重  
五重複子裏不教人見道是玄旨以爲保重大  
錯瞎屢生你向枯骨上覓什麼汁有一般不識



好惡向教中取意度商量成於句義如把屎塊  
子向口裏含了吐過與別人猶如俗人打傳口  
令相似一生虛過也道我出家被他問著佛法  
便即杜口無詞眼似漆突口如匾擔如此之類  
逢彌勒出世移置他方世界寄地獄受苦大德  
你波波地往諸方覓什麼物踏你脚版濶無佛  
可求無道可成無法可得外求有相佛與汝不  
相似欲識汝本心非合亦非離道流真佛無形

真道無體真法無相三法混融和一處辨既  
不得喚作忙忙業識衆生  
問如何是真佛真法真道乞垂開示師云佛者  
心清淨是法者心光明是道者處處無礙淨光  
是三卽一皆是空名而無實有如一真正作道人  
念念心不間斷自達磨大師從西土來祇是覓  
箇不受人惑底人後遇二祖一言便了始知從  
前虛用功夫山僧今日見處與祖佛不別若第



一句中得與祖佛爲師若第二句中得與人天  
爲師若第三句中得自救不了  
問如何是西來意師云若有意自救不了云既  
無意云何二祖得法師云得者是不得云既若  
不得云何是不得底意師云爲你向一切處馳  
求心不能歇所以祖師言咄哉丈夫將頭覓頭  
你言下便自回光返照更不別求知身心與祖  
佛不別當下無事方名得法大德山僧今時事

不獲已話度說出許多不才淨你且莫錯據我  
見處實無許多般道理要用便用不用便休祇  
如諸方說六度萬行以爲佛法我道是莊嚴門  
佛事門非是佛法乃至持齋持戒擊油不潤道  
眼不明盡須抵債索飯錢有日在何故如此入  
道不通理復身還信施長者八十一其樹不生  
耳乃至狐峰獨宿一食卯齋長坐不臥六時行  
道皆是造業底人乃至頭目隨腦國城妻子象



馬七珍盡皆捨施如是等見皆是苦身心故還  
招苦果不如無事純一無雜乃至十地滿心菩  
薩皆求此道流蹤跡了不可得所以諸天歡喜  
地神捧足十方諸佛無不稱歎緣何如此爲今  
聽法道人用處無蹤跡  
問大通智勝佛十劫坐道場佛法不現前不得  
成佛道未審此意如何乞師指示師云大通者  
是自己於處處達其萬法無性無相名爲大通

智勝者於一切處不疑不得一法名爲智勝佛  
者心清淨光明透徹法界得名爲佛十劫坐道  
場者十波羅蜜是佛法不現前者佛本不生法  
本不滅云何更有現前不得成佛道者佛不應  
更作佛古人云佛常在世間而不染世間法道  
流你欲得作佛莫隨萬物心生種種法生心滅  
種種法滅一心不生萬法無咎世與出世無佛  
無法亦不現前亦不曾失設有者皆是名言章



句接引小兒施設藥病表顯名句且名句不自  
名句還是你目前昭昭靈靈鑑覺聞知照燭底  
安一切名句大德造五無間業方得解脫  
問如何是五無間業師云殺父害母出佛身血  
破和合僧焚燒經像等此是五無間業云如何  
是父師云無明是父你一念心求起滅處不得  
如響應空隨處無事名為殺父云如何是母師  
云貪愛為母你一念心入欲界中求其貪愛唯

見諸法空相處無著名為害母云如何是出  
佛身血師云你向清淨法界中無一念心生解  
便處處黑暗是出佛身血云如何是破和合僧  
師云你一念心正達煩惱結使如空無所依是  
破和合僧云如何是焚燒經像師云見因緣空  
心空法空一念決定斷迥然無事便是焚燒經  
像大德若如是達得免被他凡聖名礙你一念  
心祇向空拳指上生實解根境法中虛捏怪自



輕而退屈言我是凡夫他是聖人禿屢生有甚  
死急披他師子皮卻作野干鳴大丈夫漢不作  
丈夫氣息自家屋裏物不肯信祇麼向外覓上  
他古人閒名句倚陰博陽不能特達逢境便緣  
逢塵便執觸處惑起自無准定道流莫取山僧  
說處何故說無憑據一期間圖畫虛空如彩畫  
像等喻道流莫將佛爲究竟我見猶如廁孔菩  
薩羅漢盡是枷鎖縛人底物所以文珠仗劍殺

於瞿曇鶻掘持刀害於釋氏道流無佛可得乃  
至三乘五性圓頓教迹皆是一期藥病相治并  
無實法設有皆是相似表顯路布文字差排且  
如是說道流有一般禿子便向裏許著功擬求  
出世之法錯了也若人求佛是人失佛若人求  
道是人失道若人求祖是人失祖大德莫錯我  
且不取你解經論我亦不取你國王大臣我亦  
不取你辯似懸河我亦不取你總明智慧唯要



你真正見解道流設解得百本經論不如一箇  
無事底阿師你解得即輕懷他人勝負修羅人  
我無明長地獄業如善星比丘解十二分教生  
身陷地獄大地不容不如無事休歇去飢來喫  
飯睡來合眼愚人笑我智乃知焉道流莫向文  
字中求心動疲勞吸冷氣無益不如一念緣起  
無生超出三界權學菩薩大德莫因循過日山  
僧往日未有見處時黑漫漫地光陰不可空過

腹熱心忙奔波訪道後還得力始到今日共道  
流如是話度勸諸道流莫爲衣食看世界易過  
善知識難遇如優曇華時一現耳你諸方聞道  
有箇臨濟老漢出來便擬問難教話不得被山  
僧全體作用學人空開得眼口總動不得懵然  
不知以何答我我向伊道龍象蹴踏非驢所堪  
你諸處祇指胸點肋道我解禪解道三箇兩箇  
到這裏不奈何咄哉你將這箇身心到處簸兩



片皮誑諱閻閻喫鐵棒有日在非出家兒盡向  
阿脩羅界攝夫如至理之道非諍論而求激揚  
鏗鏘以摧外道至於佛祖相承更無別意設有  
言教落在化儀三乘五性人天因果如圓頓之  
教又且不然童子善財皆不求過大德莫錯用  
心如大海不停死屍祇麼擔卻擬天下走自起  
見障以礙於心上無雲麗天普照眼中無翳  
空裏無花道流你欲得如法但莫生疑展則彌

綸法界收則絲髮不立歷歷孤明未曾欠少眼  
不見耳不聞喚作什麼物古人云說似一物則  
不中你但自家看更有什麼說亦無盡各自著  
力珍重

○勘辨

黃檗因入厨次問飯頭作什麼飯頭云揀衆僧  
米黃檗云一日喫多少飯頭云二石五黃檗云  
莫太多麼飯頭云猶恐少在黃檗便打飯頭卻



舉似師師云我爲汝勘這老漢纔到侍立次黃  
檠舉前話師云飯頭不會請和尚代一轉語師  
便問莫太多麼黃檠云何不道來日更喫一頓  
師云說什麼來日卽今便喫道了便掌黃檠云  
這風顛漢又來這裏拏虎鬚師便喝出去後瀉  
山問仰山此二尊宿意作麼生仰山云和尚作  
麼生瀉山云養子方知父慈仰山云不然瀉山  
云子又作麼生仰山云大似句賊破人家

師問僧什麼處來僧便喝師便揖坐僧擬議師  
便打

師見僧來便豎起拂子僧禮拜師便打又見僧  
來亦豎起拂子僧不顧師亦打

師一日同普化赴施主家齋次師問毛吞巨海  
芥納須彌爲是神通妙用本體如然普化踏倒

飯牀師云太蠢生普化云這裏是什麼所在說  
蠢說細師來日又同普化赴齋問今日供養何



似昨日普化依前蹈倒飯牀師云得即得太  
生普化云瞎漢佛法說什麼麼細師乃吐舌  
師一日與河陽木塔長老同在僧堂地爐內坐  
因說普化每日在街市擊風擊顛知他是凡是  
聖言猶未了普化入衆來師便問汝是凡是聖  
普化云汝且道我是凡是聖師便喝普化以手  
指云河陽新婦子木塔老婆禪臨濟小厮兒卻  
具一隻眼師云這賊普化云賊賊便出去

一日普化在僧堂前喫生菜師見云大似一頭  
驢普化便作驢鳴師云這賊普化云賊賊便出  
去  
因普化常於街市搖鈴云明頭來明頭打暗頭  
來暗頭打四方八面來旋風打虛空來連架打  
師令侍者去纔見如是道便把住云總不與麼  
來時如何普化托開云來日大悲院裏有齋侍  
者回舉似師師云我從來疑著這漢



有一老宿參師未曾人事便問禮拜即是不禮拜即是師便喝老宿便禮拜師云好箇草賊老宿云賊賊便出去師云莫道無事好首座侍立次師云還有過也無首座云有師云賓家有過主家有過首座云二俱有過師云過在什麼處首座便出去師云莫道無事好後有僧舉似南泉南泉云官馬相踏

師因入軍營赴齋門首見員僚師指露柱問是凡聖員僚無語師打露柱云直饒道得也祇是箇木檝便入去

師問院主什麼處來主云州中糶黃米去來師云糶得盡麼主云糶得盡師以杖面前畫一畫云還糶得這箇麼主便喝師便打典座至師學前話典座云院主不會和尚意師云你作麼生典座便禮拜師亦打

有座主來相看次師問座主講何經論主云某



甲荒虛粗習百法論師云有一人於三乘十二分教明得有一人於三乘十二分教明不得是同是別主云明得即同明不得即別樂普爲侍者在師後立云座主這裏是什麼所在說同說別師回首問侍者汝又作麼生侍者便喝師送座主回來遂問侍者適來是汝喝老僧侍者云是師便打

師聞第二代德山垂示云道得也三十棒道不

得也三十棒師令樂普去問道得爲什麼也三十棒待伊打汝接住棒送一送看他作麼生普到彼如教而問德山便打普接住送一送德山便歸方丈普回舉似師師云我從來疑著這漢雖然如是汝還見德山麼普擬議師便打王常侍一日訪師同師於僧堂前看乃問這一堂僧還看經麼師云不看經侍云還學禪麼師云不學禪侍云經又不看禪又不學畢竟作箇



什麼師云總教伊成佛作祖去侍云金屑雖貴  
落眼成翳又作麼生師云將爲你是箇俗漢  
師問杏山如何是露地白牛山云咩咩師云啞  
那山云長老作麼生師云這畜生  
師問樂普云從上來一人行棒一人行喝阿那  
箇親普云總不親師云親處作麼生普便喝師  
乃打師見僧來展開兩手僧無語師云會麼云  
不會師云渾崙學不開與汝兩文錢

大覺到參師舉超拂子大覺敷坐具師擲下拂  
子大覺收坐具入僧堂衆僧云這僧莫是和尙  
親故不禮拜又不喫棒師聞令喚覺覺出師云  
大衆道汝未參長老覺云不審便自歸衆  
趙州行脚時參師遇師洗脚次州便問如何是  
祖師西來意師云恰值老僧洗脚州近前作聽  
勢師云更要第二杓惡水潑在州便下去  
有定上座到參問如何是佛法大意師下繩床



擒住與一掌便托開定佇立傍僧云定上座何不禮拜定方禮拜忽然大悟  
麻谷到參敷坐具問十二面觀音阿那面正師下繩牀一手收坐具一手擲麻谷云十二面觀音向什麼處去也麻谷轉身擬坐繩牀師拈拄杖打麻谷接卻相捉入方丈  
師問僧有時一喝如金剛王寶劍有時一喝如踞地金毛獅子有時一喝如探竿影草有時一

喝不作一喝用汝作麼生會僧擬議師便喝師問一尼善來惡來尼便喝師拈棒云更道更道尼又喝師便打  
龍牙問如何是祖師西來意師云與我過禪版來牙便過禪版與師師接得便打牙云打即任打要且無祖師意牙後到翠微問如何是祖師西來意微云與我過蒲團來牙便過蒲團與翠微翠微接得便打牙云打即任打要且無祖師



意牙住院後有僧入室請益云和尚行脚時參  
二尊宿因緣還肯佗也無牙云肯即深肯要  
無祖師意

徑山有五百衆少人參請黃檗令師到徑山乃  
謂師曰汝到彼作麼生師云某甲到彼自有方  
便師到徑山裝腰上法堂見徑山徑山方舉頭  
師便喝徑山擬開口師拂袖便行尋有僧問徑  
山這僧適來有什麼言句便喝和尚徑山云這

僧從黃檗會裡來你要知麼且問取佗徑山五  
百衆大半分散普化一日於街市中就人乞直  
裨人皆與之普化俱不要師令院主買棺一具  
普化歸來師云我與汝做得箇直裰了也普化  
便自擔去繞街市叫云臨濟與我做直裰了也  
我往東門遷化去市人競隨看之普化云我今  
日未來日往南門遷化去如是三日人皆不信  
至第四日無人隨看獨出城外自入棺內償路



行人釘之即時傳布市人競往開棺乃見全身  
脫去祇聞空中鈴響隱隱而去

○行錄

師初在黃檗會下行業純一首座乃歎曰雖是  
後生與衆有異遂問上座在此多少時師云三  
年首座云曾參問也無師云不曾參問不知問  
个什麼首座云汝何不去問堂頭和尚如何是  
佛法的大意師便去問聲未絕黃檗便打師

下來首座云問話作麼生師云某甲問聲未絕  
和尚便打某甲不會首座云但更去問師又去  
問黃檗又打如是三度發問三度被打師來白  
首座云幸蒙慈悲令某甲問訊和尚三度發問  
三度被打自恨障緣不領深旨今且辭去首座  
云汝若去時須辭和尚去師禮拜退首座先到  
和尚處云問話底後生甚是如法若來辭時方  
便接佗向後穿鑿成一株大樹與天下人作廕



涼去在師去辭黃檗云不得往別處去汝向高  
安灘頭大愚處去必爲汝說師到大愚大愚問  
什麼處來師云黃檗處來大愚云黃檗有何言  
句師云某甲三度問佛法的的大意三度被打  
不知某甲有過無過大愚云黃檗與麼老婆爲  
汝得徹困更來這裏問有過無過師於言下大  
悟云元來黃檗佛法無多子大愚擗住云這尿  
牀鬼子適來道有過無過如今卻道黃檗佛法

無多子你見箇什麼道理速道速道師於大愚  
脅下築三拳大愚托開云汝師黃檗非于我事  
師辭大愚卻回黃檗黃檗見來便問這漢來來  
去去有什麼了期師云祇爲老婆心切便人事  
了侍立黃檗問什麼處去來師云昨奉慈旨令  
參大愚去來黃檗云大愚有何言句師遂舉前  
話黃檗云作麼生得這漢來待痛與一頓師云  
說什麼待來即今便喫隨後便掌黃檗云這風



顛漢却來這裏拈虎鬚師便喝黃檗云侍者引  
這風顛漢參堂去後瀉山舉此話問仰山臨濟  
當時得大愚力得黃檗力仰山云非但騎虎頭  
亦解把虎尾  
師栽松次黃檗問深山裏栽許多作什麼師云  
一與山門作境致二與後人作標榜道了將鑊  
頭打地三下黃檗云雖然如是子已喫吾三十  
棒了也師又以鑊頭打地三下作噓噓聲黃檗

云吾宗到汝大興於世後瀉山舉此語問仰山  
黃檗當時祇囑臨濟一人更有人在仰山云有  
祇是年代深遠不欲舉似和尚瀉山云雖然如  
是吾亦要知汝但舉看仰山云一人指南吳越  
令行遇大風即止識風穴和尚也  
師待立德山次山云今日困師云這老漢寐語  
作什麼山便打師掀倒繩牀山便休  
師普請鋤地次見黃檗來挂鑊而立黃檗云這



漢困耶師云鑊也未舉困箇什麼黃檗便打師  
接住棒一送送倒黃檗喚維那扶起我維那近  
前扶云和尚爭容得這風顛漢無禮黃檗纔起  
便打維那師鑊地云諸方火葬我這裏一時活  
埋後瀉山問仰山黃檗打維那意作麼生仰山  
云正賊走卻邏蹤人喫棒  
師一日在僧堂前坐見黃檗來便閉卻目黃檗  
乃作怖勢便歸方丈師隨至方丈禮謝首座在

黃蘗處侍立黃蘗云此僧雖是後生卻知有此  
事首座云老和尚脚跟不點地卻證據箇後生  
黃蘗自於口上打一擱首座云知即得  
師在堂中睡黃蘗下來見以拄杖打版頭一下  
師舉頭見是黃蘗卻睡黃蘗又打版頭一下卻  
往上間見首座坐禪乃云下間後生卻坐禪汝  
這裏妄想作什麼首座云這老漢作什麼黃蘗  
打版頭一下便出去後瀉山問仰山黃蘗入僧



堂意作麼生仰山云兩彩一賽

一日普請次師在後行黃檗回頭見師空手乃問鑊頭在什麼處師云有一人將去了也黃檗云近前來共汝商量箇事師便近前黃檗豎起鑊頭云祇這箇天下人拈掇不起師就手掣得豎起云爲什麼卻在某甲手裏黃檗云今日大有人普請便歸院後滄山問仰山鑊頭在黃檗手裏爲什麼卻被臨濟奪卻仰山云賊是小人

智過君子

師爲黃檗馳書去滄山時仰山作知客接得書便問這箇是黃檗底那箇是專使底師便掌仰山約住云老兄知是般事便休同去見滄山滄山便問黃檗師兄多少衆師云七百衆滄山云什麼人爲導首師云適來已達書了也師卻問滄山和尚此間多少衆滄山云一千五百衆師云太多生滄山云黃檗師兄亦不少師辭滄山



仰山送出云汝向後北去有箇住處師云豈有  
與麼事仰山云但去已後有一人佐輔老兄在  
此人祇是有頭無尾有始無終師後到鎮州普  
化已在彼中師出世普化佐贊於師師住未久  
普化全身脫去  
師因半夏上黃檗見和尚看經師云我將謂是  
箇人元來是措黑豆老和尚住數日乃辭去黃  
檗云汝破夏來不終夏去師云某甲暫來禮拜

和尚黃檗遂打趁令去師行數里疑此事卻回  
終夏師一日辭黃檗檗問什麼處去師云不是  
河南便歸河北黃檗便打師約住與一掌黃檗  
大笑乃喚侍者將百丈先師禪版机案來師云  
侍者將火來黃檗云雖然如是汝但將去已後  
坐卻天下人舌頭去在後澠山問仰山臨濟莫  
辜負他黃檗也無仰山云不然澠山云子又作  
麼生仰山云知恩方解報恩澠山云從上古人



還<sub>レ</sub>有<sub>レ</sub>相<sub>レ</sub>似<sub>レ</sub>底<sub>レ</sub>也<sub>レ</sub>無<sub>レ</sub>仰<sub>レ</sub>山<sub>レ</sub>云<sub>レ</sub>有<sub>レ</sub>祇<sub>レ</sub>是<sub>レ</sub>年<sub>レ</sub>代<sub>レ</sub>深<sub>レ</sub>遠<sub>レ</sub>不<sub>レ</sub>欲<sub>レ</sub>舉<sub>レ</sub>似<sub>レ</sub>和<sub>レ</sub>尚<sub>レ</sub>滄<sub>レ</sub>山<sub>レ</sub>云<sub>レ</sub>雖<sub>レ</sub>然<sub>レ</sub>如<sub>レ</sub>是<sub>レ</sub>吾<sub>レ</sub>亦<sub>レ</sub>要<sub>レ</sub>知<sub>レ</sub>子<sub>レ</sub>但<sub>レ</sub>舉<sub>レ</sub>看<sub>レ</sub>仰<sub>レ</sub>山<sub>レ</sub>云<sub>レ</sub>祇<sub>レ</sub>如<sub>レ</sub>楞<sub>レ</sub>嚴<sub>レ</sub>會<sub>レ</sub>上<sub>レ</sub>阿<sub>レ</sub>難<sub>レ</sub>讚<sub>レ</sub>佛<sub>レ</sub>云<sub>レ</sub>將<sub>レ</sub>此<sub>レ</sub>深<sub>レ</sub>心<sub>レ</sub>奉<sub>レ</sub>塵<sub>レ</sub>刹<sub>レ</sub>是<sub>レ</sub>則<sub>レ</sub>名<sub>レ</sub>爲<sub>レ</sub>報<sub>レ</sub>佛<sub>レ</sub>恩<sub>レ</sub>豈<sub>レ</sub>不<sub>レ</sub>是<sub>レ</sub>報<sub>レ</sub>恩<sub>レ</sub>之<sub>レ</sub>事<sub>レ</sub>滄<sub>レ</sub>山<sub>レ</sub>云<sub>レ</sub>如<sub>レ</sub>是<sub>レ</sub>如<sub>レ</sub>是<sub>レ</sub>見<sub>レ</sub>與<sub>レ</sub>師<sub>レ</sub>齊<sub>レ</sub>減<sub>レ</sub>師<sub>レ</sub>半<sub>レ</sub>德<sub>レ</sub>見<sub>レ</sub>過<sub>レ</sub>於<sub>レ</sub>師<sub>レ</sub>方<sub>レ</sub>堪<sub>レ</sub>傳<sub>レ</sub>授<sub>レ</sub>師<sub>レ</sub>到<sub>レ</sub>達<sub>レ</sub>磨<sub>レ</sub>塔<sub>レ</sub>頭<sub>レ</sub>塔<sub>レ</sub>主<sub>レ</sub>云<sub>レ</sub>長<sub>レ</sub>老<sub>レ</sub>先<sub>レ</sub>禮<sub>レ</sub>佛<sub>レ</sub>先<sub>レ</sub>禮<sub>レ</sub>祖<sub>レ</sub>師<sub>レ</sub>云<sub>レ</sub>佛<sub>レ</sub>祖<sub>レ</sub>俱<sub>レ</sub>不<sub>レ</sub>禮<sub>レ</sub>塔<sub>レ</sub>主<sub>レ</sub>云<sub>レ</sub>佛<sub>レ</sub>祖<sub>レ</sub>與<sub>レ</sub>長<sub>レ</sub>老<sub>レ</sub>是<sub>レ</sub>什<sub>レ</sub>麼<sub>レ</sub>冤

家<sub>レ</sub>師<sub>レ</sub>便<sub>レ</sub>拂<sub>レ</sub>袖<sub>レ</sub>而<sub>レ</sub>出<sub>レ</sub>師<sub>レ</sub>行<sub>レ</sub>脚<sub>レ</sub>時<sub>レ</sub>到<sub>レ</sub>龍<sub>レ</sub>光<sub>レ</sub>光<sub>レ</sub>上<sub>レ</sub>堂<sub>レ</sub>師<sub>レ</sub>出<sub>レ</sub>問<sub>レ</sub>不<sub>レ</sub>展<sub>レ</sub>鋒<sub>レ</sub>鈍<sub>レ</sub>如<sub>レ</sub>何<sub>レ</sub>得<sub>レ</sub>勝<sub>レ</sub>光<sub>レ</sub>據<sub>レ</sub>坐<sub>レ</sub>師<sub>レ</sub>云<sub>レ</sub>大<sub>レ</sub>善<sub>レ</sub>知<sub>レ</sub>識<sub>レ</sub>豈<sub>レ</sub>無<sub>レ</sub>方<sub>レ</sub>便<sub>レ</sub>光<sub>レ</sub>瞪<sub>レ</sub>目<sub>レ</sub>云<sub>レ</sub>嗔<sub>レ</sub>師<sub>レ</sub>以<sub>レ</sub>手<sub>レ</sub>指<sub>レ</sub>云<sub>レ</sub>這<sub>レ</sub>老<sub>レ</sub>漢<sub>レ</sub>今<sub>レ</sub>日<sub>レ</sub>敗<sub>レ</sub>闕<sub>レ</sub>也<sub>レ</sub>到<sub>レ</sub>三<sub>レ</sub>峰<sub>レ</sub>平<sub>レ</sub>和<sub>レ</sub>尚<sub>レ</sub>問<sub>レ</sub>什<sub>レ</sub>麼<sub>レ</sub>處<sub>レ</sub>來<sub>レ</sub>師<sub>レ</sub>云<sub>レ</sub>黃<sub>レ</sub>檠<sub>レ</sub>來<sub>レ</sub>平<sub>レ</sub>云<sub>レ</sub>黃<sub>レ</sub>檠<sub>レ</sub>有<sub>レ</sub>何<sub>レ</sub>言<sub>レ</sub>句<sub>レ</sub>師<sub>レ</sub>云<sub>レ</sub>金<sub>レ</sub>牛<sub>レ</sub>昨<sub>レ</sub>夜<sub>レ</sub>遭<sub>レ</sub>塗<sub>レ</sub>炭<sub>レ</sub>直<sub>レ</sub>至<sub>レ</sub>如<sub>レ</sub>今<sub>レ</sub>不<sub>レ</sub>見<sub>レ</sub>蹤<sub>レ</sub>平<sub>レ</sub>云<sub>レ</sub>金<sub>レ</sub>風<sub>レ</sub>吹<sub>レ</sub>玉<sub>レ</sub>管<sub>レ</sub>那<sub>レ</sub>箇<sub>レ</sub>是<sub>レ</sub>知<sub>レ</sub>音<sub>レ</sub>師<sub>レ</sub>云<sub>レ</sub>直<sub>レ</sub>透<sub>レ</sub>萬<sub>レ</sub>重<sub>レ</sub>關<sub>レ</sub>不<sub>レ</sub>住<sub>レ</sub>清<sub>レ</sub>霄<sub>レ</sub>內<sub>レ</sub>平<sub>レ</sub>云<sub>レ</sub>子<sub>レ</sub>這<sub>レ</sub>一<sub>レ</sub>問<sub>レ</sub>大<sub>レ</sub>高



生師云龍生金鳳子衝破碧瑠璃平云且座喫  
茶又問近離甚處師云龍光平云龍光近日如  
何師便出去

到大慈慈在方丈內坐師問端居丈室時如何  
慈云寒松一色千年別野老拈花萬國春師云  
今古永超圓智體三山鏤斷萬里關慈便喝師  
亦喝慈云作麼師拂袖便去  
到襄州華嚴嚴倚拄杖作睡勢師云老和尚瞠

睡作麼嚴云作家禪客宛爾不同師云侍者點  
茶來與和尚喫嚴乃喚維那第三位安排這上  
座

到翠峰峰問甚處來師云黃檗來峰云黃檗有  
何言句指示於人師云黃檗無言句峰云爲什  
麼無師云設有亦無舉處峰云但舉看師云一  
箭過西天

到象田師問不凡不聖請師速道田云老僧祇



與麼師便喝云許多禿子在這裏覓什麼碗  
到明化化問來來去去作什麼師云祇徒踏破  
草鞋化云畢竟作麼生師云老漢話頭也不識  
往鳳林路逢一婆婆問甚處去師云鳳林去婆  
云恰值鳳林不在師云甚處去婆便行師乃喚  
婆婆回頭師便打  
到鳳林林間有事相借問得麼師云何得剗肉  
作瘡林云海月澄無影遊魚獨自迷師云海月

既無影遊魚何得迷鳳林云觀風知浪起翫水  
野帆飄師云孤輪獨照江山靜自笑一聲天地  
驚林云任將三寸輝天地一句臨機試道看師  
云路逢劍客須呈劍不是詩人莫獻詩鳳林便  
休師乃有頌大道絕同任向西東石火莫及電  
光罔通滄山問仰山石火莫及電光罔通從上  
諸聖將什麼爲人仰山云和尚意作麼生滄山  
云但有言說都無實義仰山云不然滄山云子



又作麼生仰山云官不容針私通車馬  
到金牛牛見師來橫按拄杖當門踞坐師以手  
敲拄杖三下卻歸堂中第一位坐牛下來見乃  
問夫賓主相見各具威儀上座從何而來太無  
禮生師云老和尚道什麼牛擬開口師便打牛  
作倒勢師又打牛云今日不著便滄山問仰山  
此二尊宿還有勝負也無仰山云勝即總勝負  
即總負

師臨遷化時據坐云吾滅後不得滅卻吾正法  
眼藏三聖出云爭敢滅卻和尚正法眼藏師云  
已後有人問你向他道什麼三聖便喝師云誰  
知吾正法眼藏向這瞎驢邊滅卻言訖端然示  
寂

師諱義玄曹州南華人也俗姓邢氏幼而穎異  
長以孝聞及落髮受具居於講肆精究毘尼博  
頤經論俄而歎曰此濟世之醫方也非教外別



傳之旨即更衣遊方首參黃檗次謁大愚其機緣語句載于行錄既受黃檗印可尋抵河北鎮州城東南隅臨漳沱河側小院住持其臨濟因地得名時普化先在彼伴狂混衆聖凡莫測師至即佐之師正旺化普化全身脫去乃符仰山小釋迦之懸記也適丁兵革師即棄去太尉默君和於城中捨宅爲寺亦以臨濟爲額迎師居焉後拂衣南邁至河府府主王常侍延以師禮

住未幾即來大名府興化寺居于東堂師無疾忽一日攝衣據坐與三聖問答畢寂然而逝時唐咸通八年丁亥孟陬月十日也門人以師全身建塔于大名府西北隅敕諡慧照禪師塔號澄靈合掌稽首記師大略

住鎮州保壽嗣法小師 延沼 謹書

鎮州臨濟慧照禪師語錄



柳枝軒發賣略目

碧岩集	二	九〇郵一〇	禪林句集	二	五五郵
臨濟錄	一	一八	宗門葛藤集	一	二五
同頭書	一	四〇	槐安國語	五	一五〇
江湖集	二	八五	荆叢毒藥	三	一三〇
無門關小本	一	一五	寒山詩闡提紀聞	三	一一〇
同鈔	一	四〇	人天眼目	三	一三〇
					一〇
					一四
					一八
					一六
					四
					六

東方堂藥房藏版書目

人天眼目 木版 三冊 上製 壹圓參拾錢 郵稅拾錢  
 江湖風月集 木版 二冊 同 八拾五錢 同 六錢  
 增訂禪門行持集 一卷拾貳錢 同 貳錢 百卷 拾圓  
 發賣所 東京市日本橋區本町三丁目十三番地  
 藥種貿易商 小西新兵衛  
 振替口座東京三四六三番

明治四十三年十一月十五日印刷  
 明治四十三年十一月廿四日發行

定價參拾五錢

不許  
 複製

賣元  
 賣捌

東京市麹町區有樂町三丁目一番地 小川柳枝軒支店  
 東京市日本橋區本町三丁目十三番地 小西東方堂藥房  
 東京市日本橋區數寄屋町九番地 六合館書店

編輯者 岡田乾兒  
 發行所 京都市御幸町錦小路上  
 印刷者 小川多左衛門  
 發行所 小川柳枝軒書店





